

## **Lu veru pueta**

Quantu poesii cci vonnu  
pi divintari pueta?  
Comu unu scrivi ‘na poesia,  
a menti sò, già è pueta.  
A mia nun mi pari giustu  
apprupriàrisi di tantu sapiri.  
Nta ogni paisi, mìnimu,  
cci su ‘na cinquantina di pueti,  
ognunu si senti megliu di l’atru.  
Po cci su chiddi ca si sèntinu  
supiriuri a Danti. Ma dicu iu,  
‘n’hànnu sali ‘ntesta ‘sti pirsuni?  
Iu haiu scrittu tanti e tanti poesii,  
haiu ricivutu un saccu di premi,  
ma pueta nun mi cci sentu  
e mancu cci sugnu.  
La poesia è ‘na vera virtù,  
cu scrivi l’havi nta lu cori,  
ogni versu, unu appressu a l’atru,  
veni dittatu di lu funnu dill’anima.  
Nni la poesia, sa va sèntiri  
lu cori båttiri forti,  
la musica nni li palori,  
l’emozzioni nni l’occhi,  
lu trimuliu nni li mani,  
la scossa nni lu corpu.  
Eccu cu è lu veru pueta!  
Lu veru pueta è chiddu ca nun scrivi  
tantu pi fari ‘na poesia, ma scrivi  
pi dari un missaggiu di beni  
e di fratillanza a la genti.  
‘Nsigràri a un picciliddu  
ca va a la scola, l’amuri pi l’atru,  
pi la paci, pi la fidi, pi lu Signuri.  
Pi mia, pi èssiri veru pueta,  
si cci a va nasciri, a va èssiri  
donu di la natura, donu di Diu.  
Sulu iddu è lu veru, unicu pueta.

2013 Giuseppe Cardella